

Wenden wir uns nun dem ersten Paar unseres Bibelzitats zu:
„Geborenwerden hat seine Zeit, und Sterben hat seine Zeit“

E neu Geseech

Un widder litt e klei Geseech
En unser ale leeve Weg.
Schäng! Pitter! Neres! Kutt eran
Un lort üch ens dä Broder an!
Eß dä nit nett? Eß dä nit stramm?
Dä danke meer dä leeve Mamm.
No sagen ich dat eine üch:
Maht met däm kleine Kääl kei Züg!
Stricht im de Bäckcher nit zovill!
Drievt met dä kleine Füüs kei Spill,
un schreit nit su un sitt alääät,
dat hä nit glich e Pännche mäht!
Un loßt in lige, wo hä litt,
domet hä nit der Schnuppe kritt.
Su! Un no gevvt der Mamm de Hand –
Doch seht nor, wie dat Männche spannt!
Hä lort mich ald ganz richtig an! –
Am Sonntag esse meer 'ne Hahn.

(Hanns Georg Braun)

Dud

Do druußen eß alles wie 't wor,
Et Levve geht stell singe Gang;
Der Himmel eß sonnig un klor,
Der Gade voll Leech un Gesang.

De Lück sin wie söns op dem Wäg,
Vör'm Hus singe Kinder e Leed,
Ming Arbeit litt widder zerääch,
Als wör en der Welt nichs passeet.

Un doch eß mie Stüvvge su kald,
Mien Hätz blod vun Leid un vun Nud
Un föhlt sich esu möd un esu ald:
Minge Jung, mingen einzigen – eß dud!

(Peter Berchem)